

LA QUOTIDIANA

FMR Fundaziun Medias Rumantschas, Via da Masans 2, 7000 Cuiru, 081 544 89 11, redacziun@fmr.ch



Regurdientschas ad Oscar Peer

La romanista Uorschla Natalia Caprez Brühlhart raquinta d'inscunter cun l'autur Oscar Peer. [Pagina 10](#)



Pass per pass enavos en la professiun

Chur@work accompagna umans cun differents handicaps che vulan s'integrar puspè en il mund professiunal. [Pagina 2](#)

FMR FUNDAZIUN MEDIAS RUMANTSCHAS



GRISCHUN

Airbnb – la raschun per mancanza d'abitaziuns?

Persunas privatas porschan singulas chombras u entiras abitaziuns ad ospas da vacanzas – Airbnb po esser ina chaussa simpla e flexibla e plinavant in bun affar per locaturas e locaturs. Talas purschidas datti era en il Grischun, cunzunt en centers turistic. Tranter 100 e 200 abitaziuns che vegnan purschidas sur talas plattafurmas ha la vischnanca da Tavau per exempel registrà. Airbnb vegn dentant era criticà: «Cunquai ch'igl è pli lucrativ d'affittar abitaziuns sur Airbnb, datti pli paucas abitaziuns per locataris permanents. Quai rinforza anc pli fitg la mancanza d'abitaziuns, cunzunt là nua ch'i dat gia bleras segundas abitaziuns scu a Tavau u en l'Engiadina», di Joshua Verböven, il president da l'Associaziun grischuna da locataris. Quant fitg che Airbnb influenzescha propi la stgarsezza da spazi d'abitat per indigens – en quest regard datti differents opiniuns. (rtr/fmr) [Pagina 3](#)

GRISCHUN CENTRAL

L'arsa an ples fassetas



Premiera digl teater da solt «Arsa da Riom» cun vetiers ena vista magnifica. FOTO ADMILL KUYLER

Premiera digl teater da solt «Arsa da Riom» digl Origen Festival Cultural sonda seira a Riom cun en public incanto. Insceno è neida chella catastrofa digl 1864 cun solt, giuier e cun musica messa an notas aposta per chel toc. Igl è betg ena produziun tradiziunala, mabagn en teater da solt adatto agl taimp dad oz cun saltunzas e saltunzs ed actours professiunals, costumes admirabels e musica tgi vo a fons. La produziun è en tagl tras l'istorgia da Riom e chegl sur ples tschantaners. Singular è betg angal igl teater da solt, mabagn er igl li noua tgi chel vign preschento. En bietg temporar pacato an 2700 meters quadrats teila melna e construia da 10000 tocs d'atschal e 2000 strubas. (fmr/gns) [Pagina 11](#)

SURSELVA

In niev café per Sagogn

Dapi la dumengia vargada ha Sagogn in niev liug da sentupada ch'ei mintgamai aviarts la dumengia suentermiezgi. L'idea da lantschar il Café Tegia Sagogn ei vegnida dalla cumissiun sagognaturissem sco quei che la presidenta da quella cumissiun, Katrin Blumberger ha dau d'entellir. Il menaschi dil café han quater uniuns da Sagogn surpriu e sagognaturissem vul sco emprem endriescher sche la purschida vegn insumma apprezzada. «Suentar il menaschi da stad vegnin nus a decider sche nus vulein cuntinuar ed adattar la purschida.» Il Café Tegia Sagogn ei mess sutretg leu nua ch'il Café Nordic ha purschiu pushegn als amatur da cuorsa liunga. Il Café Nordic ei staus serrau igl unviern vargau pervia dalla munconza da neiv. (fmr/ac) [Pagina 7](#)

Ils pensiunai ein dumandai

Urgent enqueran biaras scolas grischunas persunal d'instrucziun per il proxim onn da scola. E bugen engaschan ellas era scolasts e scolasts pensiunai sch'els ein insumma prompts da surprender ina incarica. Per il pedagog curativ Arnold Lobeck che lavura per il consorzi da scola Trun/Sumvitg ei calar suenter la pensiun mai stau in tema.

ANDREAS CADONAU/FMR

La sava dalla pensiun ha Arnold Lobeck gia contonschiu igl onn 2008 ella vegliadetgna da 63 onns. Il pedagog curativ oriunds da Cuera ha antruras frequentau il seminari scolastic a Cuera e silsunter studegiau psicologia e germanistica. Durent sia veta professiunala ha el denter auter menau ina scola speciala a Turitg e sco davos engaschi avon la pensiun ha Arnold Lobeck tgamunau il Center per pedagogia curativa dil

«L'incumbensa da 30 % ei ideala, ins ei la finfinala buca pli 20.»

Arnold Lobeck, pedagog curativ pensiunau

Principadi da Liechtenstein. Calar da luvrar suenter la pensiun ei denton mai stau ina perspectiva per igl um da che ha surpriu avon entgins onns ina incumbensa per la Casa Depuoz e ch'ei ussa engaschaus sco pedagog curativ dil consorzi da scola da Trun e Sumvitg. «La pedagogia curativa ei mia domena, quei ei quei che jeu sau e che jeu fetsch bugen», gi Arnold Lobeck che lavura aunc ella vegliadetgna da 78 onns. «L'incumbensa da 30 % ei ideala, 100 % füss memia bia, ins ei la finfinala buca pli 20.» [Pagina 5](#)

«Il portal i'l Parc Naziunal d'eira d'ürant la fin d'eivna passada ün portal in ün oter muond.»

Ina da pliras impressiuns dal redactur Martin Camichel ch'ha visità il Burning Mountain Festival a Zernez. – Pagina 9



Üna festa sco our d'üna otra realtà

Da s-chaffir ün muond surreal es part d'ün festival dal gener da musica «psytrance». E quai es eir reuschi als organisatuors da la 11avla ediziun dal Burning Mountain Festival a Zernez, chi'd es stat d'ürant la fin d'eivna passada. Bundant 6000 visitaduors da passa 70 nazions han sotà, festagià e passantà ün bel temp in cumpagnia. Ed immez aint d'eira eir la FMR, cun camera, sach da durmir e cun üna chotscha da culur. Impreschiun nun ha be fat la musica intensiva, dimpersè eir il respet da la natüra e'l respet vicendaivel dals millis da sotunzs e sotunzas. (fmr/cam) [Pagina 9](#)



10026

Servetsch d'abunents e da distribuziun: tel. 0844 226 226 mail: abo@somedia.ch

